

La Quotidiana 3-3-2016, p. 3

Duas plaivs en Lumnezia, co far quai?

■ (rtr) La fusiun da plaivs en Lumnezia che stat avant porta ha da far cun daners. Era sche nagin taidla propi gugent quai: Igl è ina fusiun che vegn preparada per betg laschar ir a perder las contribuziuns dal Corpus Catholicum. La summa exacta è numnadamain 90 000 francs ad onn che las plaivs lumnezianas na survegnan betg senza fusiunar. Il process da fusiunar ha gia entschet avant quatter onns en Lumnezia. Lura han las plaivs da Suraua fusiunà, ed avant dus onns en las trais plaivs da Degen, Vignogn e Vella sa colliadas tar la Plaiv Lumnezia amez. Atgnamain era perquai che las autras tschintg fusiunan e furman simplamain la segunda plaiv en Lumnezia. Ma dapi in onn va Morissen in' altra via e decida gia l'otra emna sur d'ina fusiun cun la Plaiv Lumnezia amez. Restan pia quatter plaivs: Vrin, Lumbrein, Cumbel e Suraua. Questas quatter plaivs èn dentant tratgas ina ord l'otra bravamain, vul dir geograficamain duas entadim la Lumnezia e duas oradim la Lumnezia. La Plaiv da Suraua è vegnida orientada sco emprima sur dals plans da fusiun. Ils da Suraua giavischan e pon senz' auter s'imaginar ina fusiun. Els giavischan dentant che las cartas vegnian anc ina giada maschadas. Quai vul dir, els san ch'i dovra duas plaivs per pudair retrair il maximum dal sustegniment dal Corpus Catholicum. Mo els giavischan che la Lumnezia vegnia partida si en Lumnezia entadim e Lumnezia dator. Quai munta che las fusiuns gest fatgas en la Lumnezia amez stuessan vegnir reponderadas. Il project uss elavurà cun Vrin, Lumbrein, Cumbel e Suraua vala mo sco sboz e sto vegnir surlavurà. Er èn ils da Suraua da l'opiniun che la fusiun na fetschia betg tanta prescha. I stoppia betg esser fusiunà gia sin il 2017, era qua proponan ils da Suraua da far in pau pli bufatg. 2018 tanscha era, è stà d'udir da pliras varts.